



INFORME DE LEGALIDADE SOBRE O PROXECTO DE ORDE POLA QUE SE APROBA O MODELO NORMALIZADO DE SOLICITUDE, A PEDIMENTO DA PARTICULARES, DE PERICIAS FORENSES AO INSTITUTO DE MEDICINA LEGAL DE GALICIA NAS RECLAMACIÓNS EXTRAXUDICIAIS FORMULADAS POR FEITOS RELATIVOS Á CIRCULACIÓN DE VEHÍCULOS A MOTOR

Esta Secretaría Xeral Técnica de conformidade co artigo 43.2 da Lei 16/2010, de 17 de decembro, de organización e funcionamento da Administración xeral e o sector público autonómico de Galicia, en relación co *proxecto de Orde pola que se aproba o modelo normalizado de solicitude, a pedimento de particulares, de pericias forenses ao Instituto de Medicina Legal de Galicia nas reclamacións extraxudiciais formuladas por feitos relativos á circulación de vehículos a motor*, emítese o seguinte:

INFORME

1. Marco normativo e competencial

Por Real decreto 2166/1994, de 4 de novembro, traspasáronse as funcións de provisión dos medios materiais e económicos para o funcionamento da Administración de Xustiza e por Real decreto 2397/1996, de 22 de novembro, modificado por Real decreto 233/1998, de 16 de febreiro, traspasáronse as funcións e servizos en materia de medios persoais, incluídos os servizos sobre provisión e medios persoais e económicos do instituto de medicina legal.

De acordo co previsto no artigo 3 do Decreto 72/2013, de 25 de abril, polo que se establece a estrutura orgánica da Vicepresidencia e Consellería de Presidencia, Administracións Públicas e Xustiza, modificado polo Decreto 20/2015, de 29 de xaneiro, de racionalización de órganos colexiados da Xunta de Galicia.

Por Decreto 119/2005, de 6 de maio créase o Instituto de Medicina Legal de Galicia (IMELGA), como órgano técnico ao servizo da Administración de xustiza, adscrito á consellería de Presidencia, Administracións Públicas e Xustiza, a organización e



supervisión do funcionamento do instituto correspóndelle á Dirección Xeral de Xustiza, de conformidade co art. 15.3 do citado Decreto.

2. Necesidade e oportunidade

Polo Decreto 46/2016, de 21 de abril, fíxanse os prezos públicos correspondentes ás pericias efectuadas a solicitude de particulares polo IMELGA nas reclamacións extraxudiciais por feitos relativos á circulación de vehículos a motor.

A comunidade autónoma pode elaborar e modificar o modelo propio de solicitude, sempre que conteña toda a información relativa á vítima lesionada, á entidade aseguradora e ás circunstancias do accidente. A presente orde adapta o modelo básico de solicitude de pericias forenses aprobado no Real decreto 1148/2015, de 18 de decembro, ás directrices establecidas pola Xunta de Galicia para a habilitación de procedementos administrativos e servizos, segundo o art. 21.2 do Decreto 198/2010.

3. Estrutura e contido

Este anteproxecto de orde está formado por 7 artigos e unha disposición adicional e tres disposicións derradeiras co seguinte contido:

Artigo 1: Obxecto

Artigo 2: Presentación

Artigo 3: Documentación

Artigo 4: consentimentos e autorizacións

Artigo 5: Saneamento da solicitude

Artigo 6: Notificacións

Artigo 7: Datos de carácter persoal

Disposición adicional única: Modificación de formularios publicados no DOG

Disposición derradeira primeira: Norma supletoria

Disposición derradeira segunda: Desenvolvemento normativo

Disposición derradeira terceira: Entrada en vigor



4. Tramitación

Polo que respecta á instrución na elaboración do proxecto normativo, esta acomodouse ao procedemento legal e ás prescricións contidas nos artigos 40 a 44 da Lei 16/2010, de 17 de decembro, de organización e funcionamento da Administración xeral e o sector público autonómico de Galicia.

O centro directivo impulsor remitiu á Subdirección Xeral de Réxime Xurídico o borrador da disposición acompañado dunha memoria xustificativa sobre a súa legalidade, acerto e oportunidade (artigo 41.2.a) da Lei 16/2010, do 17 de decembro).

Así mesmo consta o acordo previo de inicio na elaboración da dita disposición asinada pola persoa titular da Vicepresidencia e Consellería de Presidencia, Administracións Públicas e Xustiza (artigo 41.1 da Lei 16/2010, do 17 de decembro).

Unha vez recibida a documentación e logo do seu estudo, o Servizo Técnico-Xurídico da Subdirección Xeral de Réxime Xurídico, elaborou o preceptivo informe e obtivo a aprobación inicial do anteproxecto como proxecto pola persoa titular da Vicepresidencia e Consellería de Presidencia, Administracións Públicas e Xustiza (artigos 41.2 c) e 41.3 da Lei 16/2010, do 17 de decembro).

Unha vez aprobada inicialmente a disposición como proxecto, este publicouse na páxina web da Consellería, na relación dos procedementos de elaboración de disposicións administrativas de carácter xeral que estean en curso, indicando o seu obxecto e estado de tramitación, así como a posibilidade que teñen as persoas de remitir suxestións e a forma de facelo (artigo 9 da Lei 1/2016, do 18 de xaneiro, de transparencia e bo goberno e artigo 41.4 da Lei 16/2010, do 17 de decembro). Debido á urxencia na tramitación deste proxecto normativo o prazo de exposición pública reduciuse a sete días hábiles, dende o 12 ao 20 de xullo de 2016, non recibíndose ningunha alegación no devandito prazo.



A continuación o Servizo Técnico-Xurídico solicitou os informes dos órganos e unidades administrativas que deban pronunciarse sobre o texto do proxecto.

Resultou preciso solicitar un informe económico-financeiro da Dirección Xeral de Planificación e Orzamentos e un informe sobre as cuestións de legalidade e técnica normativa da Asesoría Xurídica Xeral.

Así mesmo, ao tratarse dun proxecto normativo dos referenciados no artigo 6 da lei 14/2013 de 26 de decembro, de racionalización do sector público autonómico, a saber, as disposicións de carácter xeral que regulen procedementos a instancia de parte, as bases reguladoras e as convocatorias de subvencións, así como o establecemento de servizos aos cidadáns e aos empregados públicos da Administración Xeral da Comunidade Autónoma e demais entidades integrantes do sector público autonómico, foi preciso solicitar o informe tecnolóxico e funcional emitido conxuntamente polos órganos con competencias horizontais en materia de administración electrónica e simplificación de procedementos administrativos da Xunta de Galicia.

Por tratarse dunha disposición administrativa de carácter xeral que puidera ter repercusións en cuestións de xénero, ao abeiro do artigo 8 da Lei 7/2004, de 16 de xullo, galega para a igualdade entre homes e mulleres e do artigo 42.2 da Lei 16/2010, do 17 de decembro, resultou preciso requirir informe sobre o seu impacto de xénero.

O 20 de xuño de 2016 a Dirección Xeral de Planificación e Orzamentos emitiu informe favorable sobre o proxecto de orde.

O 14 de xuño de 2016 a Secretaría Xeral de Igualdade emitiu o preceptivo informe sobre o proxecto de orde.

Con data 8 de xullo de 2016 emítese o informe conxunto da Dirección Xeral de Avaliación e Reforma Administrativa e da AMTEGA.



Finalmente, o 23 de agosto de 2016 a Asesoría Xurídica emitiu informe favorable sobre o proxecto de orde.

5. Legalidade.

En cumprimento do disposto no artigo 43.4 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, o proxecto someterase á aprobación da persoa titular da Vicepresidencia e Consellería de Presidencia, Administracións Públicas e Xustiza.

De acordo co indicado, e logo da proposta elevada pola Subdirección Xeral de Réxime Xurídico, considérase que este proxecto de orde reúne as condicións esenciais para a súa aplicación e efectividade polo que se informa favorablemente o mesmo.

Santiago de Compostela, 25 de agosto de 2016

A secretaria xeral técnica da Consellería de Presidencia, Administracións Públicas e Xustiza

Beatriz Cuiña Barja